

Gabinete das Fronteiras Marítimas

1º Andar, Ala Ocidental do Edifício  
Palácio do Governo  
Avenida Marginal  
Dili, Timor-Leste

info@gfm.tl  
www.gfm.tl

Conselho para a  
Delimitação Definitiva  
das Fronteiras  
Marítimas

## Komunikadu Imprensa


### Xanana Gusmão representa Presidente República iha Loron Dezenvolvimentu Europeia nian no iha Konferensia Oseanu ONU nian

S.E. Kay Rala Xanana Gusmão, Xefe Negosiador ba Konsellu Delimitasaun Definitiva Fronteiras Marítimas no Governu nia Representante Espesial ba Ekonomia Azul representa S.E. Presidente República, Dr. José Ramos-Horta, iha Loron Dezenvolvimentu Uniaun Europeia nian no iha ONU nia Konferensia Oseanu.

#### Loron Dezenvolvimentu Europeia

Iha 21-22 Juñu Komisaun Europeia sai uma nain ba Loron Dezenvolvimentu Uniaun Europeia nian (EDD 2022) iha Bruxelas. Ida ne'e hanesan forum Europeia kona-ba parseiru internasional nian ne'ebé ba dala 15, titulu: "Global Gateway: harí parseria sustentável ba mundu ida ne'ebé iha ligasaun ba malu".

Eventu internasional ida ne'e, Presidente Komisaun Europeia nian Ursula von der Leyen mak lidera, hatudu komitmentu Europeia nian hodi harí mundu ida ne'ebé sustentável no justu, nune'e mos hodi sai hanesan ponte ida ne'ebé sustentável no nakonu ho konfiansa hodi serbí ba ema no planeta.



*Global Gateway* ne'e Estratéjia foun Uniaun Europeia nian hodi haforsa ligasaun ne'ebé intelijente, moos no seguru iha mundu dijital, enerjia no transporte no hametin saúde, edukasaun no sistema peskiza iha mundu tomak. Ho baze ida katak kooperasaun mak xave hodi atinji mudansa loloos, liu husi investimentu no parseiru global.

Naiulun Estadu no Governu sira, nune'e mos líder organizasaun internasional sira, hato'o sira nia vizaun kona-ba *Global Gateway* iha arena sira internasional no nasional nian.

S.E. Kay Rala Xanana Gusmão hola parte iha painel kona-ba "Global Gateway iha Indo-Pasífiku", sesaun ida ne'ebé hodi hare'e fila fali ba parseria hirak ne'e entre Uniaun Europeia no Indo-Pasífiku implementa hela ona no hodi ko'alia kona-ba lisaun sira ne'ebé aprende ona no rezultadu susesu sira Estratéjia Uniaun Europeia nian hodi halo ligasaun entre Europa no Ázia (2018).

Komisaria Europea ba Parseria Internasional, Jutta Urpilainen, hola parte iha painel ne'e no iha serimonia enseramentu Forum Loron Dezenvolvimentu ne'e, ne'ebé halo partisipante sira hotu reflète kona-ba rezultadu hosi diskusaun sira ne'ebé halao ona durante loron rua ne'e. Hanesan oportunidade ida hodi hanoin kona-ba futuru no pasu ne'ebé sei tuir mai tanba eventu ida ne'e.

Konsellu nia konkluzaan kona-ba estratéjia kooperasaun iha Indo-Pasífiku nian iha ne'e:

<https://data.consilium.europa.eu/doc/document/ST-7914-2021-INIT/pt/pdf>

Lao hamutuk ho reuniaun ne'e, S.E. Kay Rala Xanana Gusmão no Jutta Urpilainen iha mos oportunidade hodi ko'alia kona-ba kooperasaun no dezenvolvimentu estratéjiku.

### Reuniaun ho Konsellu Senior

Xefe Negosiador hasoru malu ho Konsellu Senior iha Londres ba reuniaun sira ne'ebé konfidensial no estratéjiku. Inklui atualizasaun kona-ba negosiasaun fronteira sira rai no tasi nian.



### ONU nia Konferensia Oseanu

Konferensia Oseanu ba dala rua, governu Portugal no Keña mak hanesan uma nain, ne'ebé halao iha Lisboa husi 27 Juñu to'o 1 Jullu. Konferensia ne'e halibur nasaun membru ONU nian besik 160.

Sekretáriu-Jeral ONU nian, António Guterres, Prezidente Repúblika Portugal, Marcelo Rebelo de Sousa, no Prezidente Keña, Uhuru Kenyatta, hato'o sira nia diskursu abertura. Timor-Leste ne'ebé S.E. Kay Rala Xanana Gusmão mak reprezenta, nu'udar Xefe Delegasaun.

“Haburas Asaun Tasi nian bazea ba Siensia no Inovasaun ba Implementasaun Objektivu Dezenvolvimentu ne'ebé Sustentável 14: Levantamentu, Parseria no Solusaun sira” hanesan tema ba konferensia tinan ne'e nian, ne'ebé buka atu haforsa solusaun bazea ba siensia ne'ebé inovativu hodi hahú kapitulu foun ida ba asaun global ba tasi nian.

Ema presiza hare'e kona-ba ameasa hirak ne'ebé halo aat tan saúde, ekolojia, ekonomia no governansa tasi nian (asidifikasaun; foer naklekar iha tasi laran no polusaun; peskas ilegal no la iha regulamentu; uma fatin no biodiversidade ne'ebé lakon ona), konferensia ne'e hare'e liu-liu ba harí parseria bazea ba susesu ne'ebé iha ona no haforsa liu tan parseria foun ne'ebé inovativu no konkretu, hodi implementa Objektivu 14 no apoiu asaun hirak ne'ebé buka atu konserva no uza tasi no rekursu marinu ba dezenvolvimentu ne'ebé sustentável.

S.E. Kay Rala Xanana Gusmão ko'alia durante sesaun plenaria iha loron daruak, katak Timor-Leste tau esforsu tomak, atu servisu hamutuk ho sira ne'ebé iha kompromisu hanesan, atu proteje tasi ne'e no atinji Objektivu 14, no fó hanoin katak ita hotu mak vítima ba tasi ne'ebé lakon nia furak ba bebeik.



No kona-ba delimitasaun ba fronteiras marítimas permanente ho Austrália foin lalais ne'e no nune'e mos ho esforsu halo hela ho Indonézia, S.E. promove UNCLOS ba governansa diak tasi nian.

S.E. mos halo petisaun ba ajensia internasional sira hodi estabelese Sentru Edukasaun Mariña no provome kooperasaun ho nasaun viziñu sira no parseria ho Estadu sira seluk, hodi kontribui ba Ekonomia Azul ne'ebé uza tasi ne'e ho balansu hodi kontribui ba dezvoltamentu sustentável Timor-Leste nian.

Lé diskursu kompletu iha ne'e:

[https://www.gfm.tl/wp-content/uploads/2022/06/PT\\_UN-Ocean-Conference-Statement\\_28.06.2022\\_Final.pdf](https://www.gfm.tl/wp-content/uploads/2022/06/PT_UN-Ocean-Conference-Statement_28.06.2022_Final.pdf)

Lé Deklarasaun kona-ba Konferensia ONU nian iha Lisboa iha ne'e:

[https://sdgs.un.org/sites/default/files/2022-06/UNOC\\_political\\_declaration\\_final.pdf](https://sdgs.un.org/sites/default/files/2022-06/UNOC_political_declaration_final.pdf)

La'os deit iha sesaun plenaria, Xefe Delegasaun ba Konferensia Oseanu sira mos hola parte iha Dialogu Interativu hodi "Haburas konservasaun no uza tasi ho rekursu sira ho sustentável liu hosi implementa lei internasional ne'ebé refleta ona iha Nasoens Unidas nia Konvensaun ba Lei Tasi nian", ne'ebé halao iha 30 Juñu.



Lé diskursu kompletu iha ne'e:

[https://www.gfm.tl/wp-content/uploads/2022/07/PT\\_Interactive-Dialogue\\_7\\_30.06.2022\\_Final.pdf](https://www.gfm.tl/wp-content/uploads/2022/07/PT_Interactive-Dialogue_7_30.06.2022_Final.pdf)

Iha tempu hanesan mos, S.E. Kay Rala Xanana Gusmão iha oportunidade hodi hasoru malu ho Indonézia nia Ministru Kordenador ba Asuntus Marítimus no Investimentu, Jeneral Luhut Panjaitan. Sira ko'alia kona-ba perspetiva benefísiu Ekonomia Azul nian no konferensia ne'e nian, nune'e mos importansia ba negosiasaun fronteiras marítimas entre Timor-Leste ho Indonézia.

Durante reuniaun ida ho Ministra Negosius Estranjeirus Singapura nian, Vivian Balakrishnan, Xefe Delegasaun mos ko'alia kona-ba importansia UNCLOS nian hodi hametin papel Estadu Illa Kiik sira ne'ebé sei Dezenvolve hela.

Durante reuniaun badak ida ho Austrália nia Ministra ba Ambiente no Bé, Tanya Plibersek, S.E. Kay Rala Xanana Gusmão ko'alia kona-ba possibilidade kooperasaun nasaun rua nian iha área sira hanesan proteje ambiente, biodiversidade ahuruin nian, estabelese Sentru Edukasaun Mariña iha Timor-Leste, peskas illegal no uzu plástiku. Sira mos ko'alia kona-ba rezolusaun ba disputa fronteiras marítimas no apoiu ba relasaun entre veteranus Timoroan ho Australianu sira nian.



S.E. Kay Rala Xanana Gusmão mos halo vizita kortezia ida ba Prezidente Repúblika Portugal nian, Marcelo Rebelo de Sousa, ne'ebé S.E. ko'alia kona-ba ninia espetasaun kona-ba komitmentu global, solusaun no parseria hirak ne'ebé sei mosu hosi konferensia ida ne'e, nune'e mos nesesidade ba polítika konkretu, liu-liu nasaun sira ne'ebé tasi haleu nian.



## Konferensia Anual Institutu Portugues ba Lei Tasi nian

Konferensia Anual Dahuluk Institutu Portugues ba Lei Tasi nian, halao hamutuk ho Institutu Diplomátiku Ministériu Negosius Estranjeirus no Sentru Peskiza Francisco Suárez ba Estudu Avansadu iha Lei, halao iha 28 Juñu, iha Lisboa. S.E. Kay Rala Xanana Gusmão partisipa hanesan orador prinsipal.



Ho tema “UNCLOS iha 40: Orden Internasional Tasi nian Bazea ba Regras”, intervensaun ne’e hare’e ba buat barak inklui importansia sistema internasional jestaun konflitus no governansa orden marítima internasional, ne’ebé kazu konkretu Timor-Leste nian, fó dalan ba Timor nia independensia no estabelese nia fronteiras marítimas.

Lé diskursu kompletu iha ne’e:

[https://www.gfm.tl/wp-content/uploads/2022/07/PT\\_Discurso\\_UNCLOS-at-40\\_28.06.2022.pdf](https://www.gfm.tl/wp-content/uploads/2022/07/PT_Discurso_UNCLOS-at-40_28.06.2022.pdf)